

15/10/2003

400,000 dijangka saksi karnival YPEIM

Zuraidah Mohamed

YAYASAN Pembangunan Ekonomi Islam Malaysia (YPEIM) buat julung kalinya menganjurkan Karnival Amal Jariah Antarabangsa 2003 sempena Sidang Kemuncak Pertubuhan Persidangan Negara Islam (OIC) ke-10.

Karnival bermula 16 hingga 19 Oktober ini, bertujuan membudayakan amal jariah di kalangan masyarakat serta membantu membangunkan ekonomi penduduk berpendapatan rendah.

Karnival bertema 'Berbelanja Sambil Beramal' itu, yang diadakan di Padang Letak Kereta A di Kompleks Sukan Bukit Jalil, Kuala Lumpur, bukan saja menyalurkan sumbangan kepada golongan tidak mampu tetapi masyarakat pelbagai peringkat boleh menghayati konsep amal jariah yang sebenarnya.

Ketua Pengarah YPEIM, Abdul Malek Awang Kechil berkata, karnival itu turut memberi peluang kepada usahawan terutama dalam bidang perusahaan kecil dan sederhana (PKS) mempromosikan produk dan perkhidmatan mereka sempena OIC.

"Kita memberi harga sewa gerai istimewa kepada 50 usahawan PKS yang terpilih menyertai karnival ini.

"Kita jangka lebih 400,000 orang akan mengunjungi karnival ini setiap hari selain kunjungan kira-kira 1,000 delegasi yang menghadiri sidang kemuncak OIC," katanya.

Sebanyak 33 program khas disediakan sempena karnival itu termasuk Galeri Islam dan Sains, Ekspo Pendidikan dan Kerjaya, pameran khazanah Islam, persembahan kebudayaan nasional dan antarabangsa, perarakan gajah, persembahan nasyid dan forum perdana amal.

Orang ramai boleh mengunjungi lebih 400 gerai jualan dan pameran yang dibuka dari jam 9.30 pagi hingga 10 malam membabitkan usahawan tempatan pada kadar harga rendah.

Selain itu, Konsert Amal pula diadakan 18 Oktober dengan menampilkan 12 penyanyi terkenal antaranya Yassin, Jamal Abdillah, Fauziah Ahmad Daud dan Misha Omar.

Kumpulan nasyid terkenal Hijjaz, UNIC dan Mestika juga akan membuat persembahan nasyid kontemporari pada 16 dan 17 Oktober.

Orang ramai juga berpeluang menyaksikan persembahan antarabangsa daripada 25 negara OIC selama empat hari berturut-turut bermula 16 Oktober.

Pusat Sains Negara turut menganjurkan Pameran Islam-Sains dan Teknologi yang mempamerkan penemuan sarjana dan ilmuwan Islam dalam perkembangan teknologi sepanjang karnival bermula 16 Oktober ini. Kemasukan ke pameran itu adalah percuma.

Abdul Malek berkata, pameran pendidikan yang membabitkan lebih 100 institusi pengajian tinggi awam dan swasta turut diadakan membolehkan pelajar mendapat maklumat berkaitan peluang pendidikan.

Di samping itu, Forum Perdana Amal bertemakan 'Amalan Sadaqatul Jariah dan Kesannya Kepada Pembangunan Ummah Dari Perspektif Islam' diadakan pada 17 Oktober ini mulai jam 8.45 malam.

Pada 18 Oktober pula, pemilik dan penggemar kereta antik dan motosikal berkuasa tinggi pula berpeluang menyertai konvoi dan Pameran Kereta Antik.

Abdul Malek berkata, pelaksanaan program itu selaras dengan matlamat yayasan itu untuk menangani persoalan masyarakat secara realistik serta menjana ekonomi umat Islam.

Beliau berkata, sumbangan amal jariah daripada program itu akan digunakan bagi membantu membiayai program amal jariah YPEIM yang sudah

dirancang khusus bagi membantu penduduk berpendapatan rendah.

"Kita tidak menetapkan sasaran bagi jumlah kutipan menerusi karnival ini tetapi apa yang lebih penting ialah memperluaskan maklumat dan pendidikan kepada masyarakat mengenai konsep amal jariah.

"Selain menangani persoalan masyarakat secara realistik, matlamat kita juga adalah untuk memantapkan kebajikan ummah serta membangunkan institusi Islam dengan bersepadu," katanya.

YPEIM adalah sebuah yayasan yang ditubuhkan Kerajaan Persekutuan pada 13 Oktober 1976 dan diperbadankan di bawah Trustees (Incorporation) Act 1952.

Bagi menggerakkan potensi dan meluaskan peranannya, YPEIM sudah disusun dan dilancarkan semula pada 20 Julai 1984 oleh Perdana Menteri, Datuk Seri Dr Mahathir Mohamad dan beroperasi sepenuhnya pada 1985.

Sejak 1985 hingga kini, YPEIM mengutip lebih RM60 juta sumbangan amal jariah menerusi Skim Potongan Gaji dan Skim Korporat Penyayang.

Bagaimanapun, katanya, berdasarkan perkembangan serta keperluan semasa, sumber dana menerusi saluran itu didapati tidak seimbang dengan perbelanjaan amal jariah YPEIM yang kini mencapai kira-kira RM200 juta dalam tempoh itu.

Untuk mendapatkan maklumat lanjut berhubung Karnival Amal Jariah Antarabangsa 2003, orang ramai boleh menghubungi Sekretariat Perunding YPEIM di talian 03-22732678.